

# Gyiich ne Wxaal San Pabel lo Men-Galacia

Rnab Pabel lo  
Dëdyuzh ne gaknonen  
Ne men-Galacia

**1** 1 Noo nak Pabel ne nak poxter; let méndet wye noo ni let méndet wxaal noo ne nak noo poxter, sinke laa Jesucrist nak ne wye noo yrup Ne Dëdyuzh Xuz be ne wneban Jesucrist. **2** Yra noo zegne nuu noo nee ne rlaleedx noo Jesucrist rxaal gyiichree lo de yra de ne nak de men-Galacia ne rlaleedx de Jesucrist. **3** Dëdyuzh Xuz be yrup Ne Jesucrist gaknonen de yra de no yseleedx Ne gyelendxi lo de. **4** Wdee Jesucrist si wet Ne chen guezh xdol be yra be, chen yruu be lad yra ne mal ne nuu gyözlyuree, wlaa Ne neree zegne rlaan Dëdyuzh Xuz be. **5** ¡Saknon be Dëdyuzh ydeblo siguelendxee! Zengaw.

Nonchee xdiznzoom  
Jesucrist rselaan  
mén lo dol

**6** Rnesee de lextoo noo ne orse zboleedx de Dëdyuzh no por xgyelwen Jesucrist wye Dëdyuzh de, orrenaa le de zanal ste diiz ne wrenlel, **7** per nakdeto ne nuu ste diznzoom ne rselaan mén lo dol, sinke nuu mén ne ka kagoots xtoo de yra de, rlaan men ytsaa men xdiznzoom Jesucrist. **8** Per belne nuu mén rzëët ste diiz ne wrenlel lo de ne nakdeto xdiznzoom Jesucrist ne wzëët noo lo de, Dëdyuzh yzakzi men, nyaalzhe noo ke yzëëto, nyaalzhe te angel ne wruu gyeybaa yzëëto. **9** Zegne che wzëët noo lo de, orree yzëëtgue noo we ste: Belne nuu mén rzëët ste diiz ne wrenlel lo de ne nakdeto

x diznzoom Jesucrist ne wzëët  
noo lo de, Dëdyuzh yzakzi men.

**10** Noo ryedet noo gan pezee  
gyan noo wen nes lo mén, sinke  
le noo rye gan pezee gyan noo  
wen nes lo Dëdyuzh; belne nako  
ne rye noo gan pezee gyan noo  
wen nes lo mén, che nakdetre  
noo men ne rlaa xdiin Jesucrist.

### Gan pezee wak Pabel poxter

**11** Yra de ne no de rlaleedx  
Jesucrist, gugaknan ne diz-  
nzoomree ne rzëët noo, nakdet  
ne wlen lextoo noze mengyëzlyu,  
**12** let méndet wseleedxo lo noo,  
ni rut wneluudeto lo noo, sinke  
laa zhal Jesucrist nak ne wlaa  
ne waknan noo we.

**13** Laa de yra de che won de  
diiz pezee wak noo chekwlo  
chene benak zanal noo yra-  
ndxee ne zëëd lo ley zegne zanal  
men-Israelo. Waktoz noo lo  
yra mén ne rlaleedx Jesucrist,  
wkanal noo men, wlaan noo  
nluzh noo men. **14** Noo nak  
men ne ntoidee wanal ley guin  
ke lo yra menlaz noo ne nzëël  
noo, porke noo nak men ne  
mazre wanaldee yra xkoxtum-  
ber xpenkwlal noo. **15** Per por  
xgyelwen Dëdyuzh wye Ne noo  
axtegue chene gardet gal noo.  
Chene wlaan Ne, **16** wluu Ne  
XPee Ne lo noo, chen yzëët noo  
xdiznzoom Ne lo yra mén ne  
nakdet men-Israel. Chene wak

neree, rut lo wnabdiizdet noo,  
**17** ni wadet noo Jerusalén lo  
yra men ne kwlodee nak poxter  
ke lo noo, sinke lel gyiid gyiid-  
ske wa noo Arabia, zhich guin  
wberee ke noo Damasco.

**18** Axtegue ne wluzh tson iz  
wa noo Jerusalén chen ynebeey  
noo Bëd, nga wkaa noo lo Bëd  
chiín gbiz. **19** Per wiidet noo ni  
ste poxter, nonchee Jacob bech  
Jesucrist wii noo. **20** Yra neree  
ne kakaa noo, nli we, axtegue  
zeg rwii Dëdyuzh rkadedet noo.

**21** Zhich guin wa noo Siria  
no le Cilicia. **22** Per yra men-  
Judea ne rlaleedx Jesucrist,  
gardet ynebeey men noo che-  
guin, **23** noze ron men ruu  
mén xdiiz noo, re mén: “Mén  
ne wkanal be chekwlo, naaree  
le men kazëët xdiiz Jesucrist  
ne rlaleedx be no chekwlo  
wlaan men nluzh meno.” **24** Por  
neguin wzaknonre men Dëd-  
yuzh por ne no noo che rlaleedx  
Jesucrist.

### Wna stebëd poxter wtsëlsaa men Pabel

**2** **1** Lex chene che wluzh  
chidaa iz, wa noo Jeru-  
salén ste yrup noo Bernabe, no  
wano noo Tito. **2** Wa noo porke  
laa Dëdyuzh wlaa ne waknan  
noo ne rap noo degne tsa noo.  
Lex waandxee wdop noo yra  
noo men ne rnebëéy lo yra  
men ne rlaleedx Jesucrist, lex

wzëet noo lo men gan pezee  
rzëet noo xdiznloon Jesucrist  
lo men ne nakdet men-Israel.  
Wlaa noo neree, porke rlaan  
noo ne ykyiinre yra dxiin ne  
kalaa noo no le yra dxiin ne che  
wlaa noo. **3** Per ni Tito ne wano  
noo, rut wkyeendet ne nyuu  
men beey ne ruu men-Israel,  
mase men-griego nak men. **4** No  
ngueedxendxee wdee txup tson  
mén lad noo yra noo, mén guin  
noze rkanlo men ne rlaleedx  
men Jesucrist, chen kwii men  
gan pe nuu ne zëed lo ley che  
wsalzaan noo ne che rlaleedx  
noo Jesucrist no chen ykyen-  
fwers men noo ne ylaa noo we  
ste. **5** Per axtegue wdeedet noo  
si ne nyun men gan nseggee  
men lextoo noo porke rlaandet  
noo ne ysalzaan de xdiznloon  
Jesucrist, laa we nak diznli.

**6** Le yra men guin ne rnii  
mén men ne rnebéey, betlel  
ne kweb wzëedet men lo noo  
ne ylaa noo. Per noo bet lyaaz  
nuudet noo gan txu nak men,  
porke por Dëdyuzh tese nak  
yra mén. **7** Lel wyenen men  
ne Dëdyuzh nak ne wseleedx  
lo noo ne yzëet noo xdiznloon  
Jesucrist lo men ne nakdet men-  
Israel zegne wseleedx ke Ne lo  
Bëd ne yzëet Bëdo lo men-Israel.  
**8** Dëdyuzh ke ne wye Bëd ne  
gak Bëd poxter lo men-Israel,  
laake Ne nak ne wye noo ne gak  
noo poxter lo men ne nakdet

men-Israel. **9** Jacob, Bëd, no  
le Xwa, gyon men zeree nak ne  
rnebéey lo yra men ne rlaleedx  
Jesucrist; laa men wyenen ne  
laa Dëdyuzh nak ne wseleedx  
dxiinree lo noo. Wnëez men nya  
noo yrup noo Bernabe zegnak  
te beey ne ryan men byen ne  
noo yrup noo Bernabe nak ne  
tsazëet xdiznloon Jesucrist lo  
men ne nakdet men-Israel, le  
laa men yzëeto lo men-Israel.  
**10** Nonchee ne na men lo noo  
si nak ne ynileedx noo ne gun  
noo xyudar menprob, no neguin  
ke nak ne che kalaa noo.

### Wakndux Pabel lo Bëd

**11** Per chene wa Bëd Antio-  
quia, wakndux noo lo Bëd porke  
axtegue ngyidet ne rlaa Bëd.  
**12** Porke primer ru Bëd yra  
Bëd men ne nakdet men-Israel,  
per chene wdxii tebëd mén ne  
wxal Jacob, wtsëlsaadetre Bëd  
mén guin ne nakdet men-Israel  
por ne rdxe Bëd men-Israel;  
**13** axtegue no stebëd men-Israel  
ne rlaleedx Jesucrist wlaa ne  
kalaa Bëd mase nan men ne  
ngyideto; axtegue Bernabe wlaa  
zenga. **14** Por neguin chene wii  
noo ne rlaadet Bëd yra Bëd men  
zegne zëed lo xdiznloon Jesu-  
crist, re noo lo Bëd nes lo men  
yra men: “Laa de men-Israel  
nak de, no le de mbán zegne  
mbán men ne nakdet men-Israel;  
¿penak rkyenfwers de men ne

nakdet men-Israel ne ybán men zegne mbán men-Israel?

**Por ne rlaleedx  
mén Jesucrist, rlaáá  
men lo dol**

**15** “Laa be axtegue ne wal be men-Israel nak be, nakdet be mendol zegnak men ne nakdet men-Israel mendol. **16** No nan be ne ni te mén rakdet perdon por ne rlaa men zegne zéed lo ley ne wdee Dëdyuzh lo Moises, sinke por ne rlaleedx men Jesucrist. Por neguin nak ne no be wlaleedx Ne chen gun Dëdyuzh be perdon por ne rlaleedx be Ne, per nakdeto por ne rlaa be zegne zéed lo ley, porke rut rakdet perdon por ne rlaa men zegne zéed lo ley.

**17** “Orrenaa, belne wun Dëdyuzh be perdon por ne rlaleedx be Jesucrist no belne ryenen be ne no be nak mendol, ¿pequin laa Jesucrist nak ne rlaa ne rak be mendol? ¡Let zengadeto! **18** Porke belne che wsalzaan noo yra ne zéed lo ley ne wdee Dëdyuzh lo Moises, lex rberee noo rlaa noo ne zéed lo ley guin ste, noo ke rlaa ne ryab noo lo dol. **19** Porke por noo che batre rkyiindet ley, por neguin wsalzaan noo we, chen ybán noo zegne rlaan Dëdyuzh. **20** Run noo kwent ne wet noo yrup noo Jesucrist chene wcaa Ne lo kruz, naaree naa let nozdet noo

mbán, sinke laa Jesucrist nak ne raknonen noo; gyelembán ne rap noo, rap noo we por ne rlaleedx noo XPe Dëdyuzh ne ryaan noo no ne wdee si wet por noo. **21** Rlaandet noo koleedx noo xgyelwen Dëdyuzh, porke belne nako ne run Dëdyuzh perdon xdol me por ne rlaa me zegne zéed lo ley, bat ykyiindet ne wet Jesucrist cheguin.”

**Wakndux Pabel 10  
men-Galacia**

**3** **1** ¡Men-Galacia, penak nzél de! ¿Txuzh wtsowzél xgyeryen de? No chene wzéet noo ne wcaa Jesucrist lo kruz, axtegue zegnak nake-ndxoo wzéet noo we lo de yra de. **2** Nonchee ne rlaan noo nak ne yke de neree ne ynabdiiz noo lo de: ¿Pe por ne rlaa de ne zéed lo ley raknonen XEspíritu Dëdyuzh de u por ne wlaleedx de xdiiz Jesucrist chene won do? **3** ¡Pe nuu mén ne wdeelel beey nzél! No che wen wzelo de zanal de xnëz Jesucrist por XEspíritu Dëdyuzh, le naaree le de rlaan ysalzaano. ¿Pe rzaa lextoo de ne zun de gan gakxnëz de noze laa de ne nak de noze mén? **4** ¿Pe bat wkyiindet yrandxee ne wak de sufrir? ¡Naleg Dëdyuzh skyiino! **5** Chene rseleedx Dëdyuzh XEspíritu Ne lo de no chene rlaa Ne gyelmilaguer lad de yra de, ¿penak rlaa No?

Rlaadet No por ne rlaa de zegne zëed lo ley, sinke le Ne rlaa we por ne wlaleedx de xdiiz Jesucrist chene won do.

**6** Zegnak Abraham, wlaleedx Abraham Dëdyuzh; por neguin wun Ne Abraham kwent zegnak te men ne nunk wlaadet dol. **7** Por neguin rap de degne gaknan de ne men ne rlaleedx Dëdyuzh, men guin nak zegnak zhiinpee Abraham. **8** Axtegue chekwlo che re lo xgyiich Dëdyuzh ne zun Dëdyuzh perdon men ne nakdet men-Israel belne ylaleedx men Dëdyuzh. Laa we nga re Dëdyuzh lo Abraham axtegue chekwlo chene re Dëdyuzh: “Por laa de gaknonen noo yrandxee mén ne nuu gyözlyu.” **9** Por neguin nak ne raknonen Dëdyuzh yra mén ne rlaleedx Jesucrist zegne waknonen ke Dëdyuzh Abraham por ne wlaleedx Abraham Dëdyuzh.

**10** Zuu xkastig men ne nuu lextoo ne por ne rlaa men ne zëed lo ley ne wdee Dëdyuzh lo Moises yláá men lo dol. Zuu xkastig men porke rundet men gan ylaa men yra we, porke lo xgyiich Dëdyuzh re: “Zuu xkastig yrandxee mén ne rlaadet yra yrandxee ne zëed lo ley.” **11** Por neguin nak ne ryenen be ne ni te mén rakdet perdon por ne rlaa men ne zëed lo ley; porke lo xgyiich Dëdyuzh re: “Men ne che wak perdon por

ne rlaleedx men Dëdyuzh zap men stelel gyelembán.” **12** Per redet lo ley ne rap mén degne ylaleedx meno, sinke le we re: “Men ne rlaa yrandxee ne zëed lo ley, zegne zëed ke lo ley ybán men.”

**13** Jesucrist nak ne wselaa be lo kastig ne zëed lo ley, laa Ne wak sufrir ne le xdol be wezh, porke lo xgyiich Dëdyuzh re: “Yrandxee mén ne ret lo kruz laa men ne mazre maldee nga.” **14** Wak neree, chen por ne por Jesucrist no mén ne nakdet men-Israel yganen ne nzoon ne che re Dëdyuzh lo Abraham no chen por ne rlaleedx be Jesucrist gaknonen XEspíritu Dëdyuzh be zegne che re Dëdyuzh.

### Xkwent ley no le xkwent ne re Dëdyuzh lo Abraham

**15** Yra de ne no de rlaleedx Jesucrist, yzëét noo lo de gan pezee rlaa mengyözlyu: Chene rzhexkwaa men te gyiich ne rdeese men firemo, rut gakdet yluzho, ni rut gakdet ykaar diiz lo we. **16** Orrenaa, che re Dëdyuzh lo Abraham yra ne ylaa Ne por Abraham no le por men ne zëed xnëz Abraham. Per rakzëëdet lo xgyiich Dëdyuzh ne por yrandxee men ne zëed xnëz Abraham ylaa No, sinke por tendxee men, laa men nga nak Crist. **17** Yra neree ne na noo,

zeree rna we: Ley ne wlenza chene che wluzh tapgwyuuno-galebchii iz ne re Dëdyuzh lo Abraham ne nuu ne ydee Ne lo Abraham, nuudet yluzho neguin ne re Ne lo Abraham, ni wlaadeto ne nyaknondet neguin ne re Ne lo Abraham. **18** Porke belne por ne rlaa mén yra ne zëéd lo ley nak ne ykakwент men ne che re Dëdyuzh ne ydee Ne lo Abraham, che nakdetro por diiz guin ne che re Ne, per wdee No porke che re Ne ne sdee No.

**19** Naap naa yna de: “¿Pa ykyiin ley cheguin?” Dëdyuzh wsan ley chen gyenen mén ne mendol nak mén axtegue ne le “men ne zëéd xnëz Abraham” wdxiid zegne che re Dëdyuzh. Laa xangel Dëdyuzh wdee ley lo Moises, lex laa Moises wzëéto lo mén. **20** Per le Dëdyuzh rut wkyiinden Ne ne nzëét xdiiz Ne lo Abraham, sinke tete Ne wzëéto, porke tendxee Ne.

### Che rkyiindetre ne ylaa be zegne zëéd lo ley

**21** ¿Pegin xkonter diiz ne re Dëdyuzh ylaa Ne nuu ley ne wdee Ne lo Moises? Let zengadeto. Belne nako ne nyuu te ley ne yseleedx gyelembán, cheguin si rap men degne ylaa men yra ne zëéd lo ley chen gun Dëdyuzh men perdon. **22** Per lo xgyiich Dëdyuzh re yrandxee

mén nak zegnak mén ne che wdoo lo dol, chen yrandxee mén ne ylaleedx Jesucrist gun gan ykakwент ne re Dëdyuzh ydee Ne lo men.

**23** Antes ne chiid Jesucrist, wak be zegnak mén ne che wdoo lo ley axtegue ne le Ne wdxiid. **24** Antes ne chiid Ne, wap be degne wlaa be zegne zëéd lo ley zegnak minwin ne rap degne rlaa ne rkyeen xmaxter miin. Naaree naa che wak be perdon por ne rlaleedx be Ne. **25** Per orree ne che rlaleedx be Ne, che rkyiindetre ne ylaa be zegne zëéd lo ley.

**26** Porke por ne rlaleedx be Ne, yrandxee be nak zhiin Dëdyuzh. **27** Porke yrandxee be zegne wrobnis be ne nak be xpén Jesucrist, che tebegue nak be yra be Ne, **28** niguelzhe men-Israel nak be, niguelzhe men-griego, niguelzhe mén ne che wdoo o mén ne ka liber, niguelzhe mgyeey, niguelzhe wnaa, porke por Jesucrist che tese nak be por ne tebegue nak be yra be Ne. **29** No por ne che xpén Jesucrist nak be, che xnëz Abraham zëéd be, no be ykakwент ne re Dëdyuzh ydee Ne lo Abraham.

**4** **1** Zegnak te mëdwin ne benak xiz, mase laa ne ryal ne wsan xuz ne, per nuudet ynebééygue no, nak ke ne zegnak mén ne che wdoo, mase

laa ne nak merpee xpexwaano. **2** Nuu men ne rapkwent ne no nuu ke men ne rapkwent yra ne nak xen ne, axtegue ne ydxiin tyemp ne wsu xuz ne ne yka-kwent no. **3** Zenga ke nak be yra be. Chene gardet ylaleedx be Jesucrist, laa yra ne nuu gyëzlyuree nak ne wnebéey lo be. **4** Per chene wdxiiin tyemp ne wsu Dëdyuzh, wxaal Ne XPee Ne ne wal zegne ral mengyëzlyu no ne wlaa zegne zëed lo ley ne wdee Dëdyuzh lo Moises, **5** chen yselaa XPee Ne men ne rlaa zegne zëed lo ley, por neguin wak be zhiin Dëdyuzh.

**6** No por ne che nak be zhiin Ne, wxaal Ne XEspíritu XPee Ne wdee lextoo be, no por Espíritu guin nan be lo Ne: “*¡Abba*”, Dëde!” **7** Por neguin che nak-detre be mén ne che wdo, sinke che zhiin Dëdyuzh nak be; no por ne che nak be zhiin Ne, por Jesucrist no ke be gyal ne ryal men ne nak zhiin Ne.

### Za mén ne rlaleedx Jesucrist lextoo Pabel

**8** Chekwlo chene gardet tsanal de xnëz Dëdyuzh, nak de zegnak mén ne che wdo lo yra bneb ne rlaa mén xdëdyuzh mén no nlidet ne dëdyuzh nako. **9** Per naaree ne che zanal de

xnëz Dëdyuzh, o mazre wendee yna noo ne che wlaa Dëdyuzh ne zanal de xnëz Dëdyuzh, ¿penak rberee de rzaknon de yra bneb ne axtegue bat rkyiindet? ¿Pe rlaan de gak de zegnak mén ne che wdoo lo we ste? **10** No naaree ne no de rlaleedx ne nuu dxe ne nda, mëëw ne nda, tyemp ne nda, iz ne nda zegne rlaa men-Israel, **11** kesentyent rdxe noo tegue bat ykyiindet ne wzëét noo xdiiz Jesucrist lo de yra de.

**12** Yra de ne no de rlaleedx Jesucrist, rnab noo lo de ne tsanaldet de ley ne wdee Dëdyuzh lo Moises zegne rlaa noo ne zanaldetre noo we. Neree ne na noo nakdeto ne na noo ne nuu pe ne mal wlaa de noo. **13** Laa de yra de nan de ne chene primerendxee wzëét noo xdiznsoon Jesucrist lo de, rzhun noo chene wzëét noo we. **14** Mase zenga, no wun de noo wantar wsalzaandet de noo, ni wboleedxdet de noo, sinke kesentyent wen wak de lo noo, penon te xangel Dëdyuzh wzak de noo, penon Jesucrist wzak de noo. **15** ¿Orrenaa gozh gyel-gwzhiil guin? Porke nan noo ne belne nyak nboo de bzalo de, nniiz do lo noo. **16** ¿U lel rwinyaan de noo ne wzëét noo diznli lo de?

<sup>a</sup>4:6 *Abba rna Dëde.*

**17** Yra mén ne rzëëdet xdiznzoön Jesucrist zegne ryal yzëët meno, kesentynet nulyaaz men de, per rlaadet meno kon gyelwen, sinke le men rlaa we porke rlaan men ne ysalaan de noo yra noo chen tee de lad men. **18** Let maldet ne tsulyaaz men semén men, per kon gyelwen ylaa meno no syemper ylaa meno, ylaadet meno nonchee chene ka noo lad de yra de. **19** Zhiin, baanske rak noo sufrir por laa de ste, rzak noo zegne rzak wnaa chene rzebyoob men ne rzan men zhiin men, no zakre noo sufrir axtegue ne tsanal de xnëz Jesucrist zegne ryal tsanal do. **20** ;Zoon noo naal pezee orguee zu noo lad de laa zhal noo, chen yniidetre noo dizndux lo de, porke ni nandetre noo gan pezee ylaa noo de yra de!

### Xkwent Agar yrup Agar Sara

**21** Laa de yra de ne rlaan de tsanal de yra ne zëëd lo ley ne wdee Dëdyuzh lo Moises, noze guna gan ;pe gardet gon de ne zëëd lo ley guin? **22** Porke nga zëëd ne wap Abraham txup mëdbee: te ne wap Abraham yrup Abraham wnaa ne wzii Abraham chen ylaa men dxiin lo Sara lzaa Abraham, le ste ne wap Abraham yrup Abraham lzaa Abraham. **23** Mëëd ne wap

wnaa guin ne wzii Abraham, wal ne zegne ral ke yrandxee mëëd, per le mëëd ne wap lzaa Abraham, wal ne porke che re Dëdyuzh lo Abraham. **24** Ne wzak yrup wnaa guin zeree rna we: Tebo nak néz ne ydxiin mén lo Dëdyuzh; le stebo nak ley ne wdee Dëdyuzh lo Moises gyey-Sinaí; yrandxee mén ne zanal ley, nak men zegnak mén ne che wdoo lo ley zegne wak Agar lo Abraham. **25** Agar rna Jerusalén ne nuu naaree no le gyey-Sinaí ne zob Arabia, porke yra mén ne nuu Jerusalén nak men zegnak mén ne che wdoo lo ley. **26** Per le Jerusalén ne nuu gyeybaa, liber men ne tsuu we, laa be nak ne tsuu we. **27** Porke lo xgyiich Dëdyuzh re:

Laa de wnaae ne axtegue nuudet gap de mëëd,  
guzhiilen laa de ne axtegue yëten de mëëd;  
gugobtsaa por gyel-gwzhiil, laa de ne nandet de pezee nak yoob ne rzak wnaa ne rzan mëëd,  
porke wnaa ne axtegue yëten mëëd, laa men nak ne mazre gap mëëd  
ke lo wnaa ne rap mëëd.

**28** Yra be ne rlaleedx be Jesucrist, no be nak zhiin Abraham zegne che re Dëdyuzh, zegnak Isaac zhiin Abraham zegne

che re Dëdyuzh lo Abraham. **29** Per zegne wak tyemp guin ne winyaan xpee Agar xpee Sara, zenga ke rak naaree: Rwiynaan men ne zanal ley men ne rlaleedx Jesucrist. **30** Per lo xgyiich Dëdyuzh zëed ne re Sara: “Wnaa gwa ne wzii de, guzunëz men yrup men zhiin men, porke ykakwentet zhiin men logne ykakwent zhiin noo.” **31** Por neguin yra be ne rlaleedx be Jesucrist, nakdet be zhiin Agar, sinke le be nak zhiin Sara.

### Mén ne rlaleedx Jesucrist che rlaadetre men yra ne zëed lo ley

**5** 1 Jesucrist wlaa ne che rlaadetre be yra ne zëed lo ley chen liber ybán be. Por neguin gusudíp yra de no ybereedetre de gak de zegnak mén ne che wdoo lo ley ne wdee Dëdyuzh lo Moises.

2 Noo nak Pabel, gukagyedyag neree ne yna noo lo de yra de: Belne laa de ne tsuu de beey ne ruu men-Israel, bat ykiindet ne wlaa Jesucrist por laa de. 3 Ynague noo lo de yra de ste ne kwaskyertee mgyeev ne tsuu beey ne ruu men-Israel, rap men degne ylaa men yrandxee ne zëed lo ley ne wdee Dëdyuzh lo Moises. 4 Mén ne rlaan gak perdon por ne rlaa men ne zëed lo ley, che wboleedx men Jesucrist, rlaandetre

men xgyelwen Dëdyuzh. **5** Per le laa be, por Espíritu Sant nanwen be ne chene ydxiin be lo Dëdyuzh, che neeydetre be dol por ne rlaleedx be Jesucrist. **6** Porke chene che nak be xpén Jesucrist, che batre rkyiindet ne tsuu be beey o ne tsuudet zeg be beey, sinke ne rkyiin nak ne rlaleedx be Jesucrist; laa we nak ne rlaa ne ryanelsaa be.

**7** Laa de yra de cheleg wen wzelo de zanal de xdiiz Jesucrist. ¿Txuzh wlaa ne wsalzaan do no laa we nak diznli? **8** Porke let Dëdyuzhdet ne wye de ne gak de xpén Ne wlaa we. **9** Por neguin nitleedxet de diiz ne re: “Tebëdwinegue lebadur rnessegyi ydendxee ngob.” **10** Noo nanwen noo ne laa Jesucrist gaknonen de chen ysalzaandet de ne che wseed de; per sguu Dëdyuzh xkastig men ne ka kagoots xtoo de, nyaalzhe gan txuzhtezhe ne.

**11** Gukwii gante yra de ne no de rlaleedx Jesucrist, belne nako ne benak rkyeen noo mén ne tsuu men beey ne ruu men-Israel, kwinyaandet men-Israel noo. Belne benak rlaa noo zenga, tsunyaandet lextoo men-Israel ne gon men ne laa Jesucrist wgyizh xdol yrandxee mén chene wkaa Ne lo kruz. **12** Yra mén gwa ne ka kagoots xtoo de yra de, jnaal pezee laake men ytxugnëz ydendxee ne ndaanen men!

**13** Laa de yra de ne no de rlaeedx Jesucrist, Dëdyuzh wye de chen gyan de liber, ylaadetre de yra zegne zëed lo ley, per let por ne rlaadetre de yra zegne zëed lo ley, ne ylaa de ne mal ne rlaantee de ne nak de mengyëzlyu, sinke gugun xyudar xkompanyer de por ne ryanelaa de. **14** Porke yrandexee ne zëed lo ley, kon tendxoo ylaa mén laa ne run men kumplir yrandxoo nga; laa we nga nak ne re: “Gugyaan semén de zegne ryaan ke de de.” **15** Per belne laa de ne rulsaa de no ne rkaleylsaa de, gugap kwent tegue laake de yluzh de yra de.

### Zegne rlaan Espíritu Sant ne ylaa mén

**16** Por neguin yna noo lo de yra de: Gulaa ne rlaan Espíritu Sant, ylaadet de ne mal ne rlaantee de ne nak de mengyëzlyu. **17** Porke yra ne mal ne rlaan noze mengyëzlyu, rlaandeto Espíritu Sant, ni Espíritu Sant rlaandeto. Rwyaaan Espíritu Sant yra ne mal guin, rwyaaan ko Espíritu Sant; por neguin nak ne nuudet ylaa de logne rlaantee de. **18** Per belne rlaa de ne rlaan Espíritu Sant, cheguin si che rkyiindetre ne ylaa de yra ne zëed lo ley.

**19** Nakbeeygue gan gonezhe nak ne rlaa mén ne nak noze mengyëzlyu: rkano men mén

ne nakdet lzaa men, rkango-gue xkompanyer men chene gardet ytsëlnya men, rlaa men ne nzaz, rlaa men ne mal ne rlaan led men, **20** rzaknon men mdoo, rlaa men gyelebruj, rwinyanelaa men, rdilelsaa men, selos men, rlayaa men, ndeblextoo men, rzobnadil men mén, rlaa men ne rak mén txup grup, **21** rakmbidye men, rket men semén men, rkaa men guu, rdee men lo beey ru men chene ra men ledne rak lni, ndalre ne rzaglo neree rlar men. Ynague noo lo de yra de zegne che ke na noo chekwlo, ne men ne rlaa yra neree, gakdet ydxiin men ledne rnebééy Dëdyuzh.

**22** Per le ne rseleedx Espíritu Sant nak ne ryanelaa mén, ne rzhiilen mén, ne ndxi ybán mén, ne pasens mén, ne nzaak lextoo mén, ne wen mén, ne run mén kumplir xdiiz mén, **23** ne ndoo mén, no le ne run mén gan rsoow men lo yra ne mal ne rlebleedx men ylaa men. Yra neree ne rseleedx Espíritu Sant, yët ley ne ysoow lo we. **24** Yra men ne nak xpén Jesucrist, yra xdol men che nako zegnak ne wkaa lo kruz yra we ne mal ne rlaan led men no le ne rlaan men ylaa men. **25** Kom che raknonen Espíritu Sant be, yoo ylaa be ne rlaan Espíritu Sant.

**26** Tsugyadet lextoo be, ni yzobnadildet be xkompanyer be, ni gakmbidyyedet be por xkompanyer be.

### Rap mén degne gunelsaa xyudar semén men

**6** 1 Yra de ne no de rlaleedx Jesucrist, yna noo lo de ne belne nuu xkompanyer de wyab lo dol, laa de ne che rlaa de ne rlaan Espíritu Sant, rap de degne ynino de men chen ylaadetre meno, per kon dizndoo ynino de men. Gugap kwentegue lel no de gyab lo dol. 2 Gugunelsaa xyudar de te te de chene pe rzak de, chen zenga ylaa de ne rkyeen Jesucrist.

3 Belne nuu men re ne nuu txu nak men chene axtegue rut nakdet men, laake men rkade men. 4 Laake de gugyen gan pe rlaa de te te de; belne wen ne rlaa de, cheguin si zak tsugya lextoo de, per quedet de ne wendee ne rlaa de ke ne rlaa ste mén. 5 Porke rap rap de xdiixi de te te de.

6 Men ne rseed xdiznzoom Jesucrist, rap men degne ydee men tebéd logne rapendxee men lo men ne rneluu xdiznzoom Jesucrist lo men.

7 Ykadedet de de laake de, porke rut gundet gan yzhidx-no Dëdyuzh. Logne rlabni mén, neguin ke nak ne rtop men

chene le we ral. 8 Men ne rlaa ne mal ne rlaantee men ne nak men noze mengyëzlyu, neguin ke nak ne ylaa ne lugh men; le men ne rlaa ne rlaan Espíritu Sant, laa Espíritu Sant ylaa ne gap men gyelembán ne nunk lughdet. 9 Por neguin ytxuugdet lextoo be ne rlaa be ne wen, porke belne rtxuug lextoo be ne rlaa be ne wen, chene ydxiin tyemp, ykakwentet be ne ryal be. 10 Por neguin te te chene gak gun be xyudar mén, yoo ylaa bo, per xyudar xkompanyer be ne rlaleedx Jesucrist nak ne mazre gundee be.

### Diiz ne zob nii gyiichree

11 Gukwii gante pezee nzhoo leter ne kakaa noo lo gyiich yxaal noo lo de yra de, laa zhal noo kakaa we. 12 Yra men ne rkyenfwers de ne tsuu de beey ne ruu men-Israel, rlaa meno noze por ne gyan men wen nes lo mén, chen ykanaldet mén men ne yzakzi mén men por ne rzëet men ne wet Jesucrist lo kruz. 13 Per ni mén ne ruu beey ne ruu men-Israel rlaadet yra ne zëed lo ley, no le men rlaan ne tsuu de beey, per noze por ne tsugya lextoo men neguin rkyeen men de ne tsuu de beey. 14 Per le noo, nonchee ne rgugya lextoo noo nak ne wet Jesucrist lo kruz; porke por ne

wet Jesucrist lo kruz, wsalzaan  
noo yra dol ne nuu gyëzlyuree  
no che nak noo zegnak men  
ne che wet nee gyëzlyuree.  
**15** Porke chene che nak be xpén  
Jesucrist, batre rkyiindet ne  
tsuu be beey o ne tsuudet zeg be  
beey. Ne rkyiin nak ne che stelel  
mbán be. **16** Yrandxee men ne  
che rlaa neree, che xpénpee  
Dëdyuzh nak men; Dëdyuzh

yseleedx gyeleendxi lo men no  
yles lextoo Ne men.

**17** Desde nedxeree rut rlaan-  
det noo ylaa ne gakre noo sufrir,  
porke che neey noo dël led noo  
ne rbonyoo ne xpén Jesucrist  
nak noo.

**18** Yra de ne no de rlaleedx  
Jesucrist, laa Ne gaknonen de  
yra de.

Zengaw.